

Date – 09/08/2025

Time - 18:30 -18:40Hrs

## AKASHVANI AIZAWL

### REGIONAL NEWS BULLETIN

#### HEADLINES ( EVENING )

- Non-Government Hospital Association chuan Mipui Health Care scheme MUHCS hmang turin an inhnuk hniam thei a, chutiang bawkin Mizoram sorkar pawhin ngaihtuahna a hman that leh ngei an beisei tih an sawi.
- Lirthei hmanga eizawng pawl hrang hrang inzawmkhawm ten, tlan chawlh an puan chu vawiin tlai dar 4 khan an ti tawp a, bungrua a thlen that loh avangin mipui ten an tuar mek.
- Lunglei Dist Thualthu leh Bualte daia kawngchhak lam min chu a min belh zel avangin lirthei tangkhang an awm belh a, harsatna an tawk chho zel.
- Operation Sindoor ah khan Pakistan indo thlawhna panga kahthlak anih thu Chief of Air Staff, Air Chief Marshall A P Singh chuan a sawi.



#### SERCHIIP MOBILE CLINIC

Non-Government Hospital Association (NGHAM) chuan Mizoram Universal Health Care System MUHCS hmang turin NGHAM a inhnuk hniam thei a, chutiang bawkin chuan Mizoram sorkar pawhin ngaihtuahna a hman that leh ngei an beisei tih an sawi

NGHAM huaihawta vawiina New Serchhipa Mobile Health Clinic neihah ZPM Serchhip Block hruaitute nen inkawmin NGHAM hruaitute chuan Universal Health Care (MUHC) Scheme an zawm loh chhan an sawifiah a, NGHAM President Dr Lalrintluanga Jahau leh a thawhpuite chuan MUHCS chu mipui tana tha, mah se Private hospital tlak chhiat hlenna tur a ni an ti a. Mizoramah Damdawi in awmsa ah pawh damlo an len mang loh laiin, mipui tana chhawr hleih theih lohva Private Hospital te an awm chu pawh an tih thu leh tha tak leh lungrua taka mipui tana tangkai thei ang bera thawh tlân ni thei se, chuta atan sorkar an ngaichang reng a ni an ti.

Kan corr report lo ngaithla ang.

*NGHAM hruaitute chuan, sorkar chu an do lo mai ni lovin thawhpui an chak reng an ti a. MUHCS hman theihna turin natna enna khawl hman man leh damlo enkawlna man sang zawk Max Hospital Delhi a mi pawh Mizoram sorkarin a pawm thei tho a, he Damdawi in a Mizoram tana 10% discount an pek pawh, Mizoram tan*

*chauh ni lovin North East State tin te tan a ni a. Chuvangin Mizoram sorkar chuan Mizoram a damlo enkawlna a pek theih zat pe in, a bak chu damlo tena an pek turin ruahman leh mai se an ti a, hetihlai hian Sorkar tan pek tur zat pek nghal mai a harsat pawhin Damlo ten an pek fel hnua rulh leh tur pawhin ruahman leh mai theih a ni an ti a ni. NGHAM hruaitute chuan hetiang a sorkar nen an inrem chuan Mizoram mipuiin Damdawiin a inenkawlna kawnga harsatna an tawh mek chu a ziaawm deuh ngei ang an ti a ni.*

New Serchhip Mercy Hospital ah Mobile Health Clinic hi neih a ni a,n, Serchhip leh a chheh vel khaw hrang hrang atangin inentir tur a hming pe sa mi 470 vel leh a hmuna kala hming ziah chawp an vaiin mi 500 chuang lai an en a ni.

<><><>

## **CM**

Chief Minister Pu Lalduhoma chuan, tun sorkar kum kal laiah kawlpheha leina an pek that avangin lawmman atan Mizoram sorkar chuan cheng nuai 186 chuang rebate peklet an ni a ti.

Chief Minister hian vawiin khan social media-ah he thu hi tarlangin, Power bill pek tlai vanga sum chawi (surcharge) titawp a, bill pek that vanga lawmman (rebate) hmulet thei zawk tura sorkar hmalakna chuan rah tha a chhuah zel a ti a. Sorkar leh mipui sum renchemna tangkai tak a ni, a ti.

Chief Minister tarlan dan chuan, tun sorkar kum kal laiah sorkarin sum a dawn hi cheng nuai 186 chuang ni tawhin, sorkar kum kaltaah khan cheng nuai 221 chuang chu hmuhlet a ni.

<><><>

## **ROAD**

Lirthei hmanga eizawng pawl hrang hrang inzawmkhawm te chuan, kawng chhia vanga tunkar chhung tlan chawlh an puan chu vawiin tlai dar 4 khan an ti tawp a, Mizo mipui ten tha taka an thlawp avangin lawmthu an sawi.

Lirthei tlan chawlh an neih chhung hian Mizoram chak lakluhna kawng chhe zualpui lai chu siam a ni a, siam zawh vek la ni chiah lo mah se sorkar thu chhuah tarlan dan chuan a chhe zualpui lai thawm that a ni tawh a, lirthei an tlang pangngai leh thei dawn hnai tawh a ni.

Mizoram chakkhai lakluhna kawngpui a chhiat avangin sumdawng hrang hrang ten bungraw lakluh kawngah harsatna an nei a, bungrua a thlen that loh avangin mipui ten an tuar mek bawk a ni.

Akashvani Aizawl zawhna chhangin Bawnghnute chikhat Verka Distributor Pu F. Lalrodinga chuan bawnghnute zawrh tur an neih loh avangin chawlhkar hnih chhung chu dawr pawh an hawng mumal tawh lo niin a sawi a. Bawnghnute chu bungraw dang nen a inang lo tih sawiin, kalkawnga rei tak thangpui chi a nih loh bakah, a chhiat phah chuan a phurtu lamin an tuar thin a, hei vang hian state pawn atangin a rawn lut tha thei rih lo tih a sawi bawk.

Aizawl Zarkawta awm Bylane Restaurant neitu Pu J. Malsawmtluanga pawhin kum dangah chuan kawng chhia tuar ve tin mah se, kumin ang em e a tawrh nasat an neih loh thu a sawi a, bungraw lakluh a harsat avangin harsatna an tawk tih a sawi bawk a ni.

Ei leh in chauh ni loin insakna bungrua leh in satu te pawhin kawng chhia hi an tuar mek. Lushai Corner neitu Pu Robert Lalthanmawia chuan, Mizoramah bungrua a lo lut muangin kal kawngah hun an hman rei thin avangin bungraw phurh man a to phah niin a sawi a, bungraw thenkhat lo thleng awm mah se a thlen kim theih mai thin loh avangin insak chungchangah harsatna an tawk tih a sawi.

<><><>

## FUEL HOARDING

Aizawl District Bawrhsap Pu Lalhriatpuia'n phalna nei lo tana tuialhthei zawrh chhuah khapna thupek a chhuah chuan zawm a hlawh lem lo a, kawngpui sira zuar thin te chuan ni dang ang bawkin a zawrh chhunzawm.

Vawiin khan Akashvani corr chuan Bawngkawn leh Durtlang Leitan inkar kawngpui a petrol zawrhna bakah Vanapa Hall kianga petrol zuar thinte a tlawh kual a, anni bakah hian Aizawl khawpui hmun thenkhatah chuan tuialhthei hi an la zuar chhuak reng a ni.

Aizawl DC chuan tun thla ni 7, Zirtawpni khan thu chhuah siamin, mi tumah in Aizawl District huam chhungah phalna nei lovin Petrol leh Diesel an zuarin an hralh tur a ni lo, a ti a. Kangmei ti chhuak a, chhiatna thlen thei a nih avangin fimkhur a ngai tih sawiin, BNSS 2023 Section 163 tlawh chhanin khapna thupek hi a chhuah a, thupek hi thla hnih chhung aw h tur niin thupek zawm lo chu dan hmanga hrem tur an ni ang.

Kan corr report lo ngaithla ang.

*(Kawng sira petrol zuar thenkhat hian Aizawl DC thupek hi an la hre lem lo a, thupek chhuah a ni tih hriate pawhin thla hnih chhung atan tih kha thla hnih hnua hman chauh tur emaw tih tawk pawh an awm bawk a, petrol an lak khawlsa te chu an la zuar chhunzawm a ni. Hetihlai hian Mizoram chak lakna kawngpui chhia avangin tuialhthei harsatna chuan ngai a la aw h thei rih lo a. Aizawl khawpui lailia Filling Station awm Zangena leh Biakliana Petrol Pump te chuan a duh apiang lei theih turin an hralh chhuak a, mi thahnem tak lak tumin an intlai a ni. Mizofed erawhin Coupon nei tan chauh an pe chhuak thung a, kar leh lamah chuan neih pangngai theih an in beisei tih an sawi a ni.*

<><><>

## INDIGENOUS DAY

Vawiin hi World Indigenous Day a ni a, hemi ni pual hian Zo Re-unification Organisation (ZORO) Vice President Pu L. Ramdinliana Renthlei chuan Zo hnahtlak zawng zawngte World Indigenous Peoples' Day chibai a buk a, Zofate hnam anga inpumkhatna leh din chhuahna a nih theih nan Zofa unau zawng zawngte duhsakna a hlan a ni.

Akashvani Aizawl in a kawmnaah Pu L. Ramdiniana chuan, Khawvelah ram leilung fate hnam lian leh chak zawkte'n an hneh lak avanga an awp beh tak hnam chi peng 5,000 lai mai an awm a, ram 90-ah inzar pharhin mihring maktaduai 370 zet an tling a ti a, Mizote pawh chu'ng zinga hnam pakhat chu an ni, a ti.

Khawvel sawrkar intel khawm pawl, UN chuan he'ng ram leilung fate hi awp bettute laka an tal chhuah theihna tur leh an pianpui dikna leh chanvote an neih let theih nan kum 2007 September ni 13 khan, 'UN Declaration on the Rights of Indigenous Peoples' puangin, a theih chen chenah mahnia ro inrel tura thuneihna pek a rawt a, he declaration hnuaiah hian Zofate pawhin tharum hman lova mahnia ro inrel a, hnam a nih hun tur nghakhlel takin an thlir mek a ni a ti.

Zoro Vice President chuan Zofate chu ram hrang hrangah then darh an la nih rih avangin hnam anga an inpumkhat a, inpeizawn a, intuamhlawm tawn hi tun dinhmuna an thlen chin a ni rih a, hemi kawngah hian an ti tha thawkhat viau nain, hmasawna tur an la ngah hle a ni, a ti.

Kum 1988 May ni 20-ah Zofate insuih khawmna tura hma latu pawl, Zo Re-unification Organisation (ZORO) din niin, May ni 21, 2004-ah Zofa zawng zawng ai awhin UNO-ah Affiliated NGO member-ah khung a ni.

<><><>

## **AIR NEWS**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

## **LUNGLEI ROADS**

Lunglei Dist Thualthu leh Bualte daia kawngchhak lam min chu a tlang tawh dawn emaw tih hnuah a min belh zel a, lirthei veivak tangkhang an awm belh a, harsatna an tawh chho zel.

Lunglei DM&R Zonal Officer Pi Grace Lalremdiki chuan nitin a hmunah awmchihin Quick Response Team (QRT) leh Police te pawh kawng min atang khan helai velah hian chhun leh zanah an duty thin a ni. Khualzin tangkhang te ei leh in tur hi Thualthu leh Bualte Kohhran, VC leh YMA te chuan an bawlsak a, heng senso zawng zawng hi DM&R DC Office Lunglei chuan a tumsak a ni.

Kan corr report lo ngaithla ang.

*Bualte khua hian an Kohhran hall-ah eirawng hi an bawl a, karkalta Inrinni 9th Aug.2025 atang khan nitin eirawng hi an bawl a, eirawngbawlna senso hi DC Office lam hian a tahtawl in an pe thin a ni. Hnamdang truck driver te erawh anmahni duh ang in buhfai an pe a, anmahni in an in bawl a ni.*

*Nimin Zirtawpni khan kawng hi tlang tawh tur a ngaih anih avangin tangkhang te ei leh in tur hi siamsak ngai tawh lo turin ruahmanna chu an han nei a, amaherawhchu tukin zinglamah kawng a min leh tak avangin khual zin hi Lunglei*

*leh Lawngtlai lamah Motor 100 bawr vel ve ve tangkhang niin a hmun a awm ten an sawi a ni.*

District thuneituten vawin khan thuchhuah siam thar leh in helai kawng a tlan te fimkhur tur leh loh theih loh thil tih lovah chuan Siaha leh Lawngtlai pan tur, kal lam leh haw lam in zawh lo tur a hriattirin khawtlang hruaitu, QRT leh Police thurawn kalh zawng a bungrua te in hlanchhawng lo tur a hriattir in Sangau lama kal turin a hriattir a ni.



## **AIR FORCE**

Operationi Sindoor ah khan Pakistan indo thlawhna panga kahthlak anih thu Chief of Air Staff, Air Chief Marshall A P Singh chuan a sawi. Vawiina Bengaluru-a Air Chief L M Katre vawi 16-naah he thu hi sawiin Chief of Airstaff chuan Pakistan Airforce thlawhna 5 leh AWaCS aricraft pakhat India sipaiten an kapthla a ti a. Hei bakah hian Shahbaz Jacobabad airfied pawh kah niin F16 thlawhna engemawzat tihchhiat a ni a ti.

